

საქართველოს მთავრობის

დადგენილება №112

2021 წლის 19 მარტი

ქ. თბილისი

„მოთხოვნები სურსათთან შეხებისათვის განკუთვნილი მასალებისა და საგნების მიმართ“ საქართველოს მთავრობის 2018 წლის 5 ივნისის №317 დადგენილებაში ცვლილების შეტანის შესახებ მუხლი 1

„ნორმატიული აქტების შესახებ“ საქართველოს ორგანული კანონის მე-20 მუხლის მე-4 პუნქტის შესაბამისად, „მოთხოვნები სურსათთან შეხებისათვის განკუთვნილი მასალებისა და საგნების მიმართ“ საქართველოს მთავრობის 2018 წლის 5 ივნისის №317 დადგენილებაში (www.matsne.gov.ge, 07/06/2018, 240110000.10.003.020632) შეტანილ იქნეს ცვლილება და დადგენილებით დამტკიცებულ წესს – „მოთხოვნები სურსათთან შეხებისათვის განკუთვნილი მასალებისა და საგნების მიმართ“ დაემატოს შემდეგი შინაარსის 5¹ მუხლი:

„მუხლი 5¹. სპეციალური მოთხოვნები სურსათთან შეხებისათვის განკუთვნილი სხვადასხვა ნივთიერების შემცველი მასალებისა და საგნების მიმართ

1. ამ წესის მე-5 მუხლის მე-2 პუნქტით განსაზღვრული მოთხოვნების გათვალისწინებით, მასალებსა და საგნებში, რომლებიც შეიცავს ვინილ-ქლორიდის მონომერს და რომლებიც დამზადებულია ვინილ-ქლორიდის პოლიმერების ან თანაპოლიმერების გამოყენებით, საიდანაც შესაძლოა, მოხდეს ვინილ-ქლორიდის მონომერის მიგრაცია და ეს მასალები და საგნები მზა (საბოლოო) სახით განკუთვნილია სურსათთან შეხებისათვის ან უკვე შეხებაშია სურსათთან, ვინილქლორიდის მაქსიმალური დონე (რაოდენობა) ყოველ 1 კგ საბოლოო პროდუქტში არ უნდა აღემატებოდეს 1 მგ-ს.

2. სურსათთან შეხებისათვის განკუთვნილ მასალებსა და საგნებში და ასევე მასალებიდან და საგნებიდან სურსათში გამოყოფილი ვინილ-ქლორიდის დონის (რაოდენობის) განსაზღვრა უნდა განხორციელდეს გაზ-ფაზური ქრომატოგრაფიით, „სრული აორთქლების ფაზის“ მეთოდის გამოყენებით.

3. მასალებიდან და საგნებიდან სურსათში გამოყოფილი ვინილ-ქლორიდის დონის (რაოდენობის) განსაზღვრისას აღმოჩენის (დეტექციის) ზღვარი უნდა შეადგენდეს 0.01 მგ/კგ-ს.

4. თუ ტექნიკური თვალსაზრისით კონკრეტულ სურსათში შეუძლებელია მასალებიდან და საგნებიდან გამოყოფილი ვინილ-ქლორიდის დონის (რაოდენობის) განსაზღვრა, შესაძლებელია, ამ სურსათთან მიმართებით, დაშვებულ იქნეს მოდელური (იმიტირებული) გარემოს გამოყენება.“.

მუხლი 2

დადგენილება ამოქმედდეს გამოქვეყნებისთანავე.

პრემიერ-მინისტრი

ირაკლი ღარიბაშვილი

